



**S P O R A Z U M**  
**FEDERALNOG ZAVODA ZA ZAPOŠLJAVANJE,**  
**ZAVODA ZA ZAPOŠLJAVANJE REPUBLIKE SRPSKE I**  
**ZAVODA ZA ZAPOŠLJAVANJE BRČKO DISTRIKTA BOSNE I HERCEGOVINE**  
**O OSTVARIVANJU PRAVA NA NOVČANU NAKNADU NEZAPOSLENIH OSOBA**

U skladu sa odredbama člana 5. Zakona o posredovanju u zapošljavanju i socijalnoj sigurnosti nezaposlenih osoba („Službene novine Federacije BiH“, br. 55/00, 41/01, 22/05 i 9/08), člana 41. stav 4. Zakona o posredovanju u zapošljavanju i pravima za vrijeme nezaposlenosti („Službeni glasnik Republike Srpske“, broj 30/10) i člana 5. Zakona o zapošljavanju i pravima za vrijeme nezaposlenosti („Službeni glasnik Brčko distrikta BiH“, br. 33/04, 19/07 i 25/08),

s ciljem prevazilaženja razlika u sistemu socijalnog osiguranja,

a radi zaštite socijalnih prava nezaposlenih osoba utvrđenih konvencijama Međunarodne organizacije rada i omogućavanja ostvarivanja prava na novčanu naknadu po osnovu nezaposlenosti nakon prestanka radnog odnosa kod poslodavca čije je sjedište u entitetu, odnosno Brčko distriktu BiH u kojem nemaju prebivalište,

sporazumne strane dogovorile su se:

## **I OPĆE ODREDBE**

### **Član 1.**

#### **(Predmet Sporazuma)**

Ovim sporazumom se regulišu uvjeti i postupak ostvarivanja prava na novčanu naknadu nezaposlenih osoba u Bosni i Hercegovini kojima je radni odnos prestao kod poslodavca čije je sjedište u entitetu, odnosno Brčko distriktu BiH u kojem nezaposlene osobe nemaju prebivalište.

### **Član 2.**

#### **(Način uplate doprinosa za osiguranje od nezaposlenosti)**

- (1) Radi osiguranja uvjeta za ostvarivanje prava na novčanu naknadu po prestanku radnog odnosa za zaposlenike čije je prebivalište na teritoriji jedne sporazumne strane, a u radnom odnosu su kod poslodavca čije je sjedište na teritoriji druge sporazumne strane, obveznik uplate doprinosa za osiguranje od nezaposlenosti ovaj doprinos obračunava u skladu sa propisima koji se primjenjuju u sjedištu poslodavca, a uplatu vrši na odgovarajuće račune u korist nosioca osiguranja prema entitetu, odnosno Brčko distriktu BiH i mjestu prebivališta zaposlenika.
- (2) Uplata doprinosa za osiguranje od nezaposlenosti vrši se:

- u Federaciju Bosne i Hercegovine na način da se 30% obračunatog iznosa doprinosa uplaćuje na račun Federalnog zavoda za zapošljavanje, a 70% iznosa doprinosa na račun kantonalne/županijske službe za zapošljavanje mjesta prebivališta zaposlenika;
- u Republiku Srpsku i Brčko distrikt BiH na način da se 70% obračunatog iznosa doprinosa uplaćuje na račune propisane u Republici Srpskoj i Brčko distriktu BiH, a 30% na račun Federalnog zavoda za zapošljavanje.

## II POSTUPAK I UVJETI OSTVARIVANJA PRAVA

### Član 3. (Podnošenje zahtjeva)

Nezaposlene osobe iz člana 1. ovog sporazuma po prestanku radnog odnosa prijavljuju se na evidenciju nezaposlenih i podnose zahtjev za ostvarivanje prava na novčanu naknadu nadležnoj službi za zapošljavanje u Federaciji Bosne i Hercegovine, odnosno filijali Zavoda za zapošljavanje Republike Srpske ili Zavodu za zapošljavanje Brčko distrikta BiH prema mjestu svog prebivališta (u daljem tekstu: nadležni organ).

### Član 4. (Odlučivanje o pravu na novčanu naknadu)

Nadležni organ koji donosi rješenje o utvrđivanju prava na novčanu naknadu, osim o pitanjima koja su predmet ovog sporazuma, odlučuje u skladu sa svojim važećim propisima.

### Član 5. (Utvrđivanje podataka)

- (1) U toku postupka za odlučivanje o pravu na novčanu naknadu po osnovu nezaposlenosti, nadležni organ kojem je podnesen zahtjev za ostvarivanje prava utvrđuje podatke o nosiocu osiguranja na čiji je račun vršena uplata i dužini trajanja uplate doprinosa za osiguranje od nezaposlenosti za podnosioca zahtjeva, posebno za minimum staža osiguranja potrebnog za ostvarivanje prava, a koji je prethodio podnošenju zahtjeva.
- (2) Ukoliko doprinos za osiguranje od nezaposlenosti nije uplaćen prema mjestu prebivališta zaposlenika, o zahtjevu za ostvarivanje prava na novčanu naknadu će odlučivati nadležni organ na čiji račun je uplaćen doprinos za osiguranje od nezaposlenosti za minimum staža osiguranja potrebnog za ostvarivanje tog prava.
- (3) U slučaju da je doprinos za minimum staža osiguranja potrebnog za ostvarivanje prava uplaćen za dio staža na račun jednog nosioca osiguranja, a za dio staža na račun drugog nosioca osiguranja, po zahtjevu će rješavati nadležni organ nosioca osiguranja na čiji račun je izvršena uplata za pretežan dio tog staža (više od 50% staža).
- (4) U slučaju da je doprinos za minimum staža osiguranja potrebnog za ostvarivanje prava uplaćivan u jednakoj dužini trajanja uplate na račun dva nosioca osiguranja, po

zahtjevu će rješavati nadležni organ nosioca osiguranja na čiji račun je izvršena uplata za dio staža koji je prethodio prestanku radnog odnosa zaposlenika.

#### **Član 6. (Dostava predmeta)**

U slučaju kada nadležni organ u toku postupka utvrdi da doprinos za minimum staža osiguranja potrebnog za ostvarivanje prava ili pretežan dio tog doprinosa nije uplaćivan prema mjestu prebivališta nezaposlene osobe, nego je uplaćivan na račun nosioca osiguranja prema mjestu sjedišta poslodavca, predmet treba odmah dostaviti nadležnom organu druge sporazumne strane na rješavanje, gdje je i uplaćivan doprinos.

#### **Član 7. (Sadržaj predmeta)**

Predmet za ostvarivanje prava na novčanu naknadu po osnovu nezaposlenosti, iz člana 6. ovog sporazuma, treba da sadrži dokumentaciju propisanu zakonima sporazumnih strana, a naročito:

- zahtjev za novčanu naknadu sa podacima o nezaposlenoj osobi – ime i prezime, datum rođenja, JMBG, datum prijave na evidenciju nezaposlenih i datum podnošenja zahtjeva ili kopiju obrasca koji se popunjava kod nadležnog biroa a sadrži navedene podatke,
- podatak o tome da li je nezaposlena osoba koristila pravo na novčanu naknadu i u kom periodu,
- kopiju lične karte,
- odluku o prestanku radnog odnosa,
- kopiju obrasca odjave sa osiguranja,
- izvod podataka iz radne knjižice ili drugi dokaz o stažu pribavljen u skladu sa važećim propisima,
- dokaz iz kojeg proizlazi podatak o subjektu na čiji je račun izvršena uplata doprinosa (izvod iz evidencije nadležnog organa i/ili dokument uplatioca doprinosa),
- potvrdu o prosječnoj neto plaći podnosioca zahtjeva za posljednja (puna) tri mjeseca rada,
- kopiju računa podnosioca zahtjeva na koji bi se uplaćivala novčana naknada.

#### **Član 8. (Dužina staža osiguranja)**

- (1) Stažom osiguranja koji se računa kao osnov za utvrđivanje dužine trajanja novčane naknade za slučaj nezaposlenosti smatrat će se staž osiguranja koji je nezaposlena osoba ostvarila na teritoriji Bosne i Hercegovine i ostalih republika bivše SFRJ.
- (2) Staž osiguranja iz prethodnog stava ovog člana utvrđuje se uvidom u radnu knjižicu podnosioca zahtjeva ili u drugi dokaz pribavljen u skladu sa važećim propisima.

**Član 9.**  
**(Dostava rješenja o novčanoj naknadi)**

- (1) U slučaju iz člana 6. ovog sporazuma, nadležni organ, koji je rješavao predmet, obavezno će jedan primjerak rješenja o utvrđivanju prava na novčanu naknadu dostaviti nadležnom organu, kod kojeg se nezaposlena osoba vodi na evidenciji nezaposlenih, radi praćenja statusa nezaposlene osobe, i jedan primjerak Federalnom zavodu za zapošljavanje, odnosno Centralnoj službi Zavoda za zapošljavanje Republike Srpske ili Zavodu za zapošljavanje Brčko distrikta BiH, radi vođenja posebnih evidencija.
- (2) Nadležni organi u toku trajanja prava na novčanu naknadu, po hitnom postupku, razmjenjuju podatke o eventualnim okolnostima koje utiču na promjenu i prestanak prava.

**Član 10.**  
**(Razmjena podataka)**

Sporazumne strane se obavezuju da će voditi posebne evidencije o broju i načinu rješavanja predmeta po zahtjevima za ostvarivanje prava na novčanu naknadu nezaposlenih osoba iz člana 1. ovog sporazuma (dužina trajanja, visina i eventualne okolnosti koje utiču na promjenu i prestanak prava) i najmanje jednom godišnje razmjenjivati predmetne podatke.

**III ZAVRŠNE ODREDBE**

**Član 11.**  
**(Rješavanje spornih pitanja)**

Eventualna sporna pitanja u vezi sa tumačenjem i/ili primjenom ovog sporazuma, sporazumne strane će rješavati međusobnim dogovorom, s ciljem da se nezaposlenim osobama omogući efikasno ostvarivanje prava.

**Član 12.**  
**(Stupanje na snagu)**

Sporazum stupa na snagu danom potpisivanja, a objavit će se u „Službenim novinama Federacije BiH“, „Službenom glasniku Republike Srpske“ i „Službenom glasniku Brčko distrikta Bosne i Hercegovine“.

**Član 13.**  
**(Okončanje nezavršenih predmeta)**

Svi postupci ostvarivanja prava na novčanu naknadu koji danom stupanja na snagu ovog sporazuma nisu pravomoćno okončani završit će se u skladu sa odredbama ovog sporazuma.

**Član 14.**  
**(Izmjene, dopune i otkaz Sporazuma)**

- (1) Izmjene i dopune ovog sporazuma mogu se vršiti u skladu sa postupkom utvrđenim za njegovo zaključivanje.
- (2) Sporazumne strane mogu otkazati ovaj sporazum pisanim putem. Ovaj sporazum prestaje da važi protekom roka od tri (3) mjeseca od dana prijema pisanog otkaza bilo koje strane, a što se objavljuje u službenim glasilima sporazumnih strana.

Za Federalni zavod  
za zapošljavanje

*Kenan Rešo*




Datum: 31.10.2012.

Broj: 1-35-2715/12

Za Zavod za zapošljavanje  
Republike Srpske

*Milko Golaković*



Datum: 31.10.2012.

Broj: 01-3035/12

Za Zavod za zapošljavanje  
Brčko distrikta BiH

*Mladenko Nenadić*



Datum: 31.10.2012.

Broj: 02-2777/12